

INFORMATIVNI

# BILTEN 2

GODINA 2024

Transparentnost Efikasnost Nezavisnost

broj



**BILTEN** ZA  **VIDLJIVOST PRAVDE**

**U FOKUSU** **KORUPCIJA U GRANTOVIMA**

**ORGANIZIRANI KRIMINAL, IZBORNE PREVARE, SARADNJA, INKLUZIJA**

# **BILTEN** **ZA VIDLJIVOST PRAVDE**

*Cijenjene građanke i građani!*

*Biltenom „ZA VIDLJIVOST PRAVDE“, u izdanju Tužilaštva Brčko distrikta Bosne i Hercegovine, nastojimo učiniti dodatne iskorake u približavanju uloge ovog organa i pravosudnog sistema javnosti, a time i jačanju javnog povjerenja u tužilački sistem i pravosudnu zajednicu u cjelini. Pravosuđe kao sistem, koji je uspostavljen da bude na usluzi građanima osiguranjem pravednog društva, mora konstantno pokazivati efikasnost, učinkovitost, javnu odgovornost i naročitu društvenu osjetljivost. Jedino u takvom sistemu svaki član zajednice može se osjećati sigurnim, jednakim pred zakonom i uvažanim pred institucijama, od kojih s punim pravom očekuje izvrsnost u radu i odnosu prema povjerenom javnom poslu. Uz brzu i efektivnu pravdu, građanin zaslužuje i punu transparentnost uz koju će se, jednako kao i svaki drugi subjekt zainteresiran za rad pravosuđa, uz lako dostupne informacije kao vrijedno javno dobro koje pripada svima, moći informirati i pravilno kritički odnositi spram rezultata institucija i ukupnog sistema.*

*Uz informacije o organizaciji, nadležnostima i misiji u osiguranju i zaštiti demokratskog društva putem vladavine prava, za koju se svakodnevno dosljedno zalažemo, u Biltenu prezentiramo informacije o radu Tužilaštva, fokusu našeg djelovanja u aktuelnom društvenom kontekstu, ali i rezultatima koje dijelimo s cijenjenim partnerskim institucijama. BORBA PROTIV ORGANIZIRANOG KRIMINALA I KORUPCIJE, s fokusom na zloupotrebe budžetskih grantova, s razlogom je glavna tema drugog broja, čijim izborom objašnjavamo svoju i ulogu drugih institucija u sektoru kojem pripadamo, djelujući kao dio šireg tima u ostvarivanju pravde u najboljem javnom interesu. Odgovor na različite zloupotrebe u oblasti izbornog procesa, inicijative i kampanje usmjerene protiv kršenja izbornih prava i sloboda, u naročitom su fokusu zajednice pred lokalne izbore, pa su opravdano i posebnom temom drugog broja Biltena.*

*Cijenimo da uspješnom saradnjom sa svim partnerima, kao i otvorenim odnosom prema stručnoj i najširoj javnosti, možemo unaprijediti efikasnost u zaštiti temeljnih društvenih vrijednosti kojima služimo, a tako i javno povjerenje u pravosuđe podići na viši stepen. U tom smislu, uz proaktivno informiranje putem svih raspoloživih kanala komunikacije i slobodan pristup informacijama, čvrsto podržavamo odvijanje i dvosmjerne komunikacije u cilju prijema korisnih informacija za izvršavanje tužilačkih nadležnosti, a svakako i prijedloga, primjedbi i sugestija koje mogu dodatno unaprijediti naše rezultate.*

*U uvjerenju da će ovaj bilten, uz naše druge informacione platforme i ustaljeno efikasne procedure pristupa javnim informacijama, takođe biti koristan servis koji će postizanjem svrhe izdavanja doprinijeti vidljivosti pravde u Bosni i Hercegovini i distriktu Brčko, upućujem Vam izraze najdubljeg poštovanja.*

**GLAVNI TUŽILAC**

**Zekerija MUJKANOVIĆ**

**Izdavač: Tužilaštvo Brčko distrikta Bosne i Hercegovine**

**Odgovorna osoba: Zekerija Mujkanović, glavni tužilac Tužilaštva Brčko distrikta BiH**

**Priprema publikacije: Samir Beganović, sekretar Tužilaštva Brčko distrikta BiH**

Tužilaštvo Brčko distrikta BiH je samostalan i nezavisan organ koji u okviru Brčko distrikta Bosne i Hercegovine preduzima propisane mjere i radnje u otkrivanju i gonjenju počinitelja krivičnih djela i vrši druge poslove određene zakonom. U okviru svojih nadležnosti Tužilaštvo štiti ostvarivanje ljudskih prava i građanskih sloboda garantiranih Ustavom Bosne i Hercegovine i Statutom Brčko Distrikta, kao i ostvarivanje prava i interesa pravnih osoba propisanih zakonom, te osigurava statutarnost i zakonitost.

Tužilaštvo vrši svoju funkciju u skladu s Ustavom BiH i Statutom Brčko distrikta BiH, te na osnovu zakona Bosne i Hercegovine i Brčko distrikta BiH. Tužilaštvo vodi istragu i goni osobe za koje sumnja da su počinili krivičnih djela i vrši druge poslove određene zakonom.

## ***ZAŠTITA DEMOKRATSKOG DRUŠTVA KROZ VLADAVINU PRAVA***

VSTV - KOMUNIKACIJSKA STRATEGIJA

***„U SVIJETU KOJI SVAKIM DANOM POSTAJE SVE IZAZOVNIJE MJESTO PRAVOSUĐE MORA OSTATI GARANT VLADAVINE PRAVA, KAO I MEHANIZAM OŽIVOTVORENJA OVOG CIVILIZACIJSKOG PRINCIPA NA KOJEM POČIVA DEMOKRATIJA“***



Tužilaštvo je uspostavljeno s jurisdikcijom na teritoriju Brčko distrikta BiH, a u ostvarivanju svoje funkcije djeluje pred Osnovnim i Apelacionim sudom Brčko distrikta Bosne i Hercegovine.



**VIZIJA - TUŽILAŠTVO DISTRIKTA PREPOZNATO JE KAO JAVNO ODGOVORNA INSTITUCIJA KOJA EFEKTIVNO DJELUJE NA UČVRŠĆIVANJU VLADAVINE PRAVA**



## ZAHVALJUJEMO NA POSJETI



Foto: TBD

*U okviru dvodnevne posjete institucijama Brčko Distrikta, Nj. E. François Delmas, ambasador Republike Francuske u BiH, posjetio je 25. januara Tužilaštvo Brčko distrikta BiH. U kurtoaznoj posjeti ovoj pravosudnoj instituciji, Nj. E. ambasador Delmas sastao se s glavnim tužiocem Zekerijom Mujkanovićem, izrazivši podršku Tužilaštvu Distrikta u djelovanju na ukupnom učvršćivanju vladavine prava u ovoj lokalnoj zajednici.*

*U posjeti ovoj instituciji, Nj. E. ambasador Delmas bio je s atašoom za unutrašnje poslove pukovnikom Philippe Gangloffom, političkom savjetnicom gđom Ophélie Ibanez i prevoditeljicom gđom Ilhanom Tucović.*

*Izrazivši zahvalnost na posjeti, iskazanoj podršci, kao i na srdačnom interesovanju za rad Tužilaštva Distrikta, glavni tužilac Mujkanović upoznao je članove visoke delegacije sa stanjem sigurnosti na području Distrikta Brčko. Nj. E. ambasadoru Republike Francuske, glavni tužilac predstavio je institucionalne resurse, glavne prioritete i ciljeve rada, istakavši važnije rezultate na polju procesuiranja kriminala ostvarene u proteklom periodu.*

SARADNJA S INSTITUCIJAMA RAZVIJENIH DEMOKRATIJA I VAŽNIM MEĐUNARODNIM PROJEKTIMA USMJERENIM NA PRUŽANJE PODRŠKE VLADAVINI PRAVA U BIH ZNAČAJNO JE DOPRINIJELO OSTVARIVANJU MISIJE I FUNKCIJE OVOG TUŽILAŠTVA U BROJNIM SEGMENTIMA.



Foto: TBD

# SIGURNOST GRAĐANA

## NAJBOLJI POKAZATELJ RADA

Tužilaštvo ima pravo i dužnost u okviru ostvarivanja svojih nadležnosti izvještavati Visoko sudsko i tužilačko vijeće BiH (VSTV) i Skupštinu Brčko distrikta BiH o svom radu kao i primjeni krivičnih zakona u Brčko distriktu, stanju kriminaliteta i tokovima kriminala, te rješavanju predmeta. I dok se na osnovu izvještaja VSTV-u formira kolektivna ocjena rada Tužilaštva, Skupština prezentirani izvještaj prima na znanje uz moguće sugestije i preporuke opće naravi.

**Kao i ranijih godina, podaci sadržani u godišnjem izvještaju o radu za 2023. godinu daju osnov za ocjenu da je stanje kriminaliteta i opće sigurnosti u Brčko distriktu BiH, kao i ranijih godina, zadovoljavajuće.**

**Kvalitet rada**

**95,25 %**

**Kolektivna  
norma 109,06 %**

*Ukupan vremenski zbir  
svih zatvorskih kazni*

**> 62 GODINE**

U odnosu na broj presuđenih osoba, procenat osuđujućih presuda iznosi 90,21%, a neosuđujućih presuda 9,78%. Od 212 osoba oglašanih krivim, za njih 92 ili za 43% izrečene su uslovne osude, za 40 osoba ili za njih 18% izrečene su novčane kazne, a za osuđenih 77 osoba ili za 37% izrečene su kazne zatvora.

Najveći broj izrečenih kazni je u trajanju do 3 mjeseca (za 35 osoba ili za 45%).

U rasponu od 3 do 6 mjeseci zatvora kažnjeno je 15 osoba ili 19%. Od 6 mjeseci do jedne godine zatvora kažnjeno je 12 osoba ili 16%.

Kaznom zatvora u rasponu od 1 do 2 godine kažnjeno je 11 osoba ili 14%.

**Kaznom zatvora u trajanju dužem od 2 godine kažnjene su 2 osobe ili 3%, koliko i kaznom dužom od 10 godina.**

Ukupan zbir svih izrečenih novčanih kazni iznosi **37.700,00 KM**, a izrečene su u 39 predmeta protiv 40 osoba.





Foto: TBD

### Predstavljeni rezultati rada za 2023. godinu

Govoreći o izvještaju o radu, glavni tužilac istakao je da je kvalitet rada ovog tužilaštva već godinama na visokom nivou od preko 95%, pojasnivši da na svakih 100 podignutih optužnica njih čak 95 rezultira osuđujućom presudom. Ukupan broj podignutih optužnica u prošloj godini veći je u odnosu na prethodnu godinu za 11% i iznosi 219. Samo jedna optužnica nije potvrđena. Uz visok kvalitet rada, Mujkanović je istakao i da je kvantitet tužilačkog rada na zavidnom nivou, naglasivši kako kolektivna norma ove institucije već drugu godinu zaredom značajno nadilazi propisane okvire. Iako je i prošle godine rad Tužilaštva bio otežan, usljed nepopunjenosti tužilačkih funkcija, prosjek ostvarenja norme po tužiocu, odnosno kolektivna norma, iznosi visokih 109,06%. Na ove ključne parametre, po kojima se inače ocjenjuje uspješnost rada svih tužilaštava u BiH, Mujkanović je dodao da brčansko tužilaštvo osmu godinu zaredom uspjeva riješiti svaku zaprimljenu prijavu u roku od svega nekoliko dana. S obzirom na način organizacije rada i provođenja unutrašnjeg nadzora, prijave se uglavnom rješavaju otvaranjem istraga, koje se nadalje u pravilu brzo sprovedu, u roku od šest mjeseci, pri čemu nema zastare krivičnog gonjenja.

Tužilaštvo Brčko distrikta BiH održalo je 8. februara prvu ovogodišnju konferenciju za medije na kojoj su predstavljeni rezultati rada ove pravosudne institucije u proteklom periodu, s fokusom na prošlu godinu. Govornici na konferenciji bili su glavni tužilac Zekerija Mujkanović i tužilac iz Odsjeka za organizirani kriminal, privredni kriminal i korupciju Pavo Radoš. Na konferenciji je prezentiran godišnji izvještaj o radu za 2023. godinu, s akcentom na obim i kvalitet rada, brzinu okončanja istraga, kao i na procesuiranje i sankcioniranje korupcije i predmeta ratnih zločina.



*„Posmatrajući konkretno istrage ratnih zločina, za istaći je da je prošlogodišnji plan ispunjen u stopostotnom iznosu, tako da je ostao u radu samo jedan predmet po poznatom počiniocu koji je nedostupan. Na nivou Distrikta praktično je realizirana Državna strategija za rad na predmetima ratnih zločina, pri čemu su najsloženiji predmeti haške oznake A riješeni još prije deset godina. Tužilaštvo nastavlja intenzivan rad na 72 predmeta ratnih zločina po nepoznatom počiniocu, od kojih je najveći broj ustupljen s nivoa pravosuđa BiH“ - naveo je Mujkanović. Akcentirajući predmete korupcije, on je iznio podatak da je u prošloj godini podignuto osam optužnica protiv dvanaest osoba, te da je procesuiranje koruptivnih krivičnih djela i dalje apsolutni prioritet u radu ovog tužilaštva.*

Odgovarajući na pitanja novinara, tužiocu su na konferenciji govorili i o procesuiranju izbornih prevara, u odnosu na koje je ovo tužilaštvo ranije ostvarilo izuzetno značajne rezultate, ali i o neriješenim ubistvima, korupciji u grantovima i zapošljavanju, te o ostalim temama za koje su mediji iskazali interesovanje.

**Tematski o korupciji u grantovima /stranice 9-12/ i zaštiti izbornog prava /stranice 13-19 Biltena)**

## ORGANIZIRANI KRIMINAL I KORUPCIJA VISOKOG NIVOVA

Kao samostalan i nezavisan organ koji preuzima propisane mjere i radnje u otkrivanju i gonjenju počinitelja krivičnih djela Tužilaštvo je svih proteklih godina nastojalo na najbolji način odgovoriti svojim zadacima. Čvrstom saradnjom s domaćim i međunarodnim institucijama i nevladinim organizacijama, medijima i građanima, uz puno

uvažavanje i ostvarivanje ljudskih prava i sloboda, Tužilaštvo u kontinuitetu djeluje na učvršćivanju vladavine prava kao apsolutnog institucionalnog cilja.

Kroz intenzivnu saradnju s nadležnim institucijama, Tužilaštvo teži konstantno doprinositi izgradnji sigurnog i pravednog okruženja.



Pored ostalih vidova saradnje u profesionalnoj zajednici, Tužilaštvo redovno učestvuje na konferencijama glavnih tužilaca, a ovogodišnja konferencija organizirana je u Tesliću. Na ovom događaju konstatovano je da je u pravcu daljnjeg unapređenja rezultata potrebno osigurati dosljednu implementaciju preporuka iz izvještaja Misije OSCE-a u BiH, koji inače potvrđuje značajan napredak u procesuiranju

predmeta korupcije i organiziranog kriminala na visokom nivou. U ovom kontekstu, tužiocima su upoznati i s preporukama Projekta regionalnog praćenja suđenja u periodu juli 2021 – mart 2024. godine, predstavljenim dan ranije na konferenciji predsjednika sudova, usmjerenim na jačanje procesne discipline i efikasnije upravljanje postupkom, kao i

*Glavne teme ovogodišnje konferencije glavnih tužilaca bili su rezultati u procesuiranju visoke korupcije, organiziranog kriminala i izbornih prevara.*

*Na konferenciji su predstavljene prioritete aktivnosti i rezultati tužilaštava u ovoj oblasti u protekloj godini, uz osvrt na upotrebu dokaza pribavljenih putem SKY i ANOM aplikacija.*

*Takođe, razgovaralo se o integritetu i imovinskim izvještajima nosilaca pravosudnih funkcija, transparentnosti i jačanju povjerenja javnosti u pravosuđe.*

*Tužilaštvo Distrikta na konferenciji je predstavljao glavni tužilac Zekerija Mujkanović (više na strani 14 Biltena).*

na usklađivanje kaznene politike u ovoj oblasti.

Konferencije predsjednika sudova i glavnih tužilaca, održane 28. i 29. maja u Tesliću, organiziralo je Visoko sudsko i tužilačko vijeće BiH, uz finansijsku podršku Misije OSCE-a u Bosni i Hercegovini i Projekta EU4 Justice II.

# NA DNEVNOM REDU STRATEŠKOG FORUMA

Borba protiv organiziranog kriminala i korupcije bila je tema i XXXI redovnog sastanka rukovodilaca tužilaštava i policijskih tijela na strateškom nivou, koji je održan 18. marta u Sarajevu.

Tokom sastanka, čiji je domaćin bilo Federalno tužilaštvo FBiH, razgovarano je o najvažnijim pitanjima saradnje tužilaštava i policijskih agencija, kao i aktivnostima koje se odnose na borbu protiv organiziranog

kriminala i korupcije. Tema Strateškog foruma bio je i pregled rezultata u procesuiranju predmeta korupcije i organiziranog kriminala, s fokusom na visoku korupciju i predmete organiziranog kriminala na visokom nivou. Također, razgovaralo se o prijedlogu rješenja za postupanje policije i tužilaštava u vezi sa kriptovalutama, te o Smjernicama o postupanju i saradnji policije i tužilaštava u informisanju javnosti.



Trideset i prvom sastanku Strateškog foruma prisustvovali su glavni tužilac Tužilaštva BiH Milanko Kajganić, glavni federalni tužilac Munib Halilović, glavna tužiteljica Republičkog javnog tužilaštva RS Željka Radović, glavni tužilac Tužilaštva Brčko distrikta BiH Zekerija Mujkanović, direktor Državne agencije za istrage i

zaštitu Darko Ćulum, direktor MUP-a RS Siniša Kostrešević, direktor Federalne uprave policije Vahidin Munjić, šef Policije Brčko distrikta BiH Goran Pisić, kao i predstavnice Visokog sudskog i tužilačkog vijeća BiH Amila Rahić i Aleksandra Todorović.

Po završetku Strateškog foruma, održan je sastanak koordinacionog tijela za rješavanje sukoba nadležnosti među tužilaštvima u BiH. Glavni tužioci, učesnici Strateškog foruma, razmatrali su u okviru ovog tijela sukob nadležnosti u dva krivična predmeta, kao i pitanje korištenja ovlaštenih službenih osoba Vojne policije BiH u postupku provođenja istražnih radnji na vojno-kontroliranom području i prema pripadnicima Oružanih snaga BiH.





# KONKRETNI REZULTATI

## GRANTOVI IZVOR RAZLIČITIH VIDOVA KORUPCIJE

U Brčko distriktu je u periodu od 2017. do 2020.g registrirano 659 udruženja, a u periodu od 2015. do 2020. godine putem grantova dodijeljeno je preko **40 (četrdeset) miliona konvertibilnih maraka.**

**Tužilaštvo je otpočelo aktivnosti istraživanja grantova 2017. godine, dok su prvi relevantni izvještaji istraživačkog novinarstva objavljeni dvije godine kasnije, 2019. godine, te su uveliko uzeti u obzir.**

Značajan udio u ukupnom broju predmeta korupcije odnosi se na malverzacije pri dodjeli i trošenju grantova namijenjenih za rad udruženja građana (NVO).

Govoreći na ovu temu na godišnjoj konferenciji za medije tužilac Pavo Radoš, iz Odsjeka za organizirani kriminal, privredni kriminal i korupciju, istakao je da je problematika dodjele i pravilnosti trošenja javnih sredstava putem tzv. grantova prisutna u cijeloj BiH, ali je bila najočitiija i najizraženija u Brčko Distriktu. Kako je objasnio medijima, ona se ogleda u netransparentnoj dodjeli velikih iznosa novčanih sredstava nevladinim organizacijama, pojedincima i gospodarskim subjektima, od strane političkih subjekata, bez precizno postavljenih uslova za dodjelu i bez valjane kontrole utroška sredstava. To u konačnici dovodi do nezakonitog trošenja tih sredstava na način da se sredstva koriste za osobne potrebe članova pravnih subjekata koja dobijaju novčana sredstva, zatim u korist osoba koje su u bliskim rodbinskim i prijateljskim vezama s odgovornim osobama koje raspolažu tim sredstvima, a velik dio dodijeljenih sredstava vraćao se osobama koje su te grantove osigurale u budžetu Distrikta.

Na konferenciji je istaknuto da su nadležne institucije (Pravobranilaštvo Brčko distrikta BiH i Ured za reviziju institucija Brčko distrikta BiH) još 2016. i 2017. godine izvještavale nadležna politička tijela, Skupštinu i Vladu Distrikta, o netransparentnosti trošenja budžetskih sredstava, kao i enormnoj količini sredstava koja se izdvaja za grantove NVO sektoru.

### CIN SARAJEVO

## VAŽAN DOPRINOS ISTRAŽIVAČKOG NOVINARSTVA

*Nezavisno od informacija koje su se kasnije pojavile u javnosti i istraživačkim medijima, istrage ovog fenomena započete su još 2017. godine, kada su u ovom tužilaštvu otvoreni prvi predmeti. Od tada ih je formirano više od dvadeset, od čega su u devet predmeta podignute optužnice.*

*Pet optužnica već je rezultiralo pravosnažnim osuđujućim presudama, a u pravilu su počiniocima istovremeno izricane zatvorske i novčane kazne, uz oduzimanje imovinske koristi.*

*Ukupna imovinska korist obuhvaćena optužnicama je preko 473.000,00 KM, dok u tekućim istragama ona iznosi dodatnih 300.000,00 KM.*

*Kao pozitivan primjer istraživačkog novinarstva Tužilaštvo je prepoznalo aktivnosti Centra za istraživačko novinarstvo Sarajevo (CIN), koji je 2019. godine sproveo nekoliko istraživanja ove problematike i utvrdio veliki broj činjenica. Iako se radi o istovjetnim okolnostima, koje je Tužilaštvo istraživalo po službenoj dužnosti, informacije CIN-a poslužile su za otvaranje novih pravaca istrage.*





## EX OFFICIO ISTRAGE

*Tužilaštvo Brčko distrikta BiH među prvim je institucijama u zemlji koje su se blagovremeno, po službenoj dužnosti, uhvatile u koštac s anomalijama u trošenju budžetskih sredstava građana. Procesuiran je veliki broj osoba, a i dalje se provode intenzivne istražne radnje s ciljem prikupljanja dokaza o krivičnopravnim radnjama u vezi s nezakonitim trošenjem grantova.*

Pred pravosuđem distrikta Brčko u međuvremenu je osuđujućom presudom pravosnažno okončano ukupno 5 (pet) predmeta.

## KAZNE I MJERE

**NAJSTROŽA KAZNA OD TRI GODINE ZATVORA IZREČENA JE BIVŠEM ZASTUPNIKU U SKUPŠTINI BRČKO DISTRIKTA BIH ĆAZIMU DAČAJU, OD KOGA JE ODUZETA IMOVINSKA KORIST U IZNOSU OD 131. 000,00 KM. IZREČENA MU JE I ZABRANA OBAVLJANJA DUŽNOSTI U TRAJANJU OD PET GODINA. (predmet visoke korupcije)**

Zbog malverzacija s grantovima osuđeni su još:

**BOŠKO VIDOVIĆ**

**(ČETIRI MJESECA ZATVORA I NOVČANA KAZNA)**

**MILAN DRAGIČEVIĆ**

**(30 DANA ZATVORA I NOVČANA KAZNA)**

**SANJA BERENC**

**(TRI MJESECA ZATVORA, USLOVNO NA DVIJE GODINE)**

**EDIN RAŽANICA**

**(ČETIRI MJESECA ZATVORA PRETHODNO VRATIO IMOVINSKU KORIST)**

U fazi optuženja su:

**ALEN MUJKIĆ**

**(IMOVINSKA KORIST 227.703,07 KM)**

**ALIJA DENJAGIĆ I ENIDA OSMANOVIĆ**

**(IMOVINSKA KORIST 32.266,00 KM) (VISOKA KORUPCIJA)**

**SIFET DURMIŠ**

**(IMOVINSKA KORIST 10. 400,00 KM)**

**IMOVINSKA KORIST U OTVORENIM ISTRAGAMA CCA 300.000,00 KM**

## OPTUŽNICA OD 118 TAČAKA

Među optužnicama koje se odnose na zloupotrebe grantova, eklatantan primjer je optužnica iz decembra 2023. godine protiv Alena Mujkića.

On je optužen da je putem udruženja građana Sportaš i Centar za kulturu i turizam pribavio sebi i drugima imovinsku korist u ukupnom iznosu od oko 230.000,00 KM.

Radi se o obimnoj optužnici od 118 tačaka, odnosno zasebnih krivičnopравnih radnji, kojom su optuženom stavljena na teret krivična djela Zloupotreba položaja ili ovlaštenja i Pranje novca.

Optužnicom je zatraženo potpuno oduzimanje svakog pojedinog iznosa pribavljene koristi, i to: 74.419,07 KM od optuženog, 137.384,00 KM od „Proleter“ d.o.o, 5.000,00 KM od „Fabrika osmijeha“ d.o.o , 1.900,00 KM od „Mega Corso“ s.p, 2.000,00 KM od „URC Bazenii“ s.p, vlasnik Alen Mujkić, 10.000,00 KM od M. P.1, 1.500,00 KM od M. P.2 i 500,00 KM od J. Š. Uz oduzimanje imovinske koristi, Tužilaštvo je sudu predložilo da optuženom izrekne i mjeru sigurnosti zabrane vršenja dužnosti odgovorne osobe i osobe ovlaštene za raspolaganje novčanim sredstvima u udruženjima i fondacijama u maksimalno propisanom trajanju od deset godina.

## PRIBAVLJENA KORIST OD 232.703,07 KM

Podizanju optužnice prethodila ja najobimnija antikorupciona istraga višegodišnjih malverzacija s budžetskim grantovima, nakon koje je Mujkić, kao odgovorna osoba u dva udruženja, optužen za najteži oblik zloupotrebe položaja ili ovlaštenja i pranje novca. Optužnicom potvrđenom pred Osnovnim sudom, Tužilaštvo je zatražilo oduzimanje imovinske koristi od svih osoba kojima je pribavljena, u ukupnom iznosu od 232.703,07 KM. Uz oduzimanje imovinske koristi od optuženog u iznosu od 74.419,07 KM, Tužilaštvo je sudu predložilo da mu izrekne i zabranu vršenja dužnosti u udruženjima i fondacijama u maksimalno propisanom trajanju od deset godina.

Optužnicom od stotinu osamnaest tačaka, od kojih se svaka odnosi na posebnu malverzaciju s dodijeljenim sredstvima, Mujkiću se stavlja na teret da je od 2017. do 2021. godine, kao osoba zadužena za osiguranje zakonitosti rada i raspolaganje novcem u udruženjima Sportaš i Centar za turizam i kulturu, sredstva grantova trošio u svoju i u korist trećih osoba. On je optužen da je, iako je bio dužan da raspolaže i upravlja imovinom udruženja s dužnom pažnjom, na odgovoran i zakonit način, u najboljem interesu udruženja, iskoristio položaj tako što je protivno ciljevima oba udruženja trećim osobama plaćao ugovore o djelu, odnosno usluge koje nisu izvršene za potrebe udruženja, te da je novac udruženja trošio za lične potrebe. Kako se navodi u optužnici, on je fiktivno prikazivao utrošak skoro polovine sredstava koje je za rad Sportaša, u iznosu od 182.000,00 KM, te Centra za kulturu i turizam, u iznosu od 240.500,00 KM, dodijelila Vlada Distrikta. Ova sredstva je stavljao u redovne finansijske tokove koristeći ih za svoje lične potrebe ili za plaćanje obaveza drugih osoba - zaključuje se u optužnici.

**Budući da iznos imovinske koristi pribavljene ovim krivičnim djelom korupcije prelazi pedeset hiljada KM, Tužilaštvo je optužilo Mujkića za najteži oblik zloupotrebe položaja ili ovlaštenja, s propisanom kaznom zatvora od najmanje tri godine (iz člana 377 stav 3 Krivičnog zakona Brčko distrikta BiH). S obzirom da je velika vrijednost takve koristi stavljena u redovne finansijske tokove, on je optužen i za teži oblik krivičnog djela pranja novca, s propisanom kaznom zatvora od jedne do deset godina (iz člana 265 stav 3 Krivičnog zakona).**



BLAGOVREMENA PRIPREMA ZA IDENTIFIKACIJU I EFIKASNO PROCESUIRANJE KRIVIČNIH DJELA IZBORNIH PREVARA, PRED NADOLAZEĆE LOKALNE IZBORE 2024. GODINE

## INTEGRITET IZBORNOG PROCESA

ZAKLJUČCI KONFERENCIJE GLAVNIH TUŽILACA  
(Teslić, 29.5.2024.godine)

SASTANAK TUŽILAŠTVA I IZBORNE KOMISIJE BRČKO DISTRIKTA  
(Brčko, 12.9.2024.godine)

REZULTATI PROCESUIRANJA IZBORNIH PREVARA - IZBORI 2020.  
DOPUNE KRIVIČNOG ZAKONODAVSTVA -PODMIĆIVANJE NA IZBORIMA

ZAJEDNIČKI TRENINZI TUŽILACA I POLICIJSKIH SLUŽBENIKA  
(Brčko, Banja Luka, Sarajevo, januar - februar 2024.godine)

SEMINAR „KRIVIČNA DJELA PROTIV IZBORNIH PRAVA“  
(Teslić, 17.9.2024. godine)

PANEL DISKUSIJA „ZAŠTITA BIRAČKOG PRAVA U BIH“  
(Zenica, 23. maj 2024. godine)

KAMPANJA - „STOP PRITISCIMA NA BIRAČE!!!“

S obzirom na to da tužilaštva i policijske agencije imaju značajnu ulogu u osiguravanju slobodnih i poštenih izbora, te jednu od ključnih uloga u zaštiti integriteta izbornog procesa, tužiocu Tužilaštva Brčko distrikta BiH tokom niza tematskih sastanaka, radionica i okruglih stolova potvrdili su naročitu inicijativu i odgovornost za zaštitu izbornog procesa.

Brojni tematski sastanci, praktični treninzi, okrugli stolovi i kampanje, koje provodi nevladina organizacija Koalicija pod lupom, a kojima je Tužilaštvo uzelo aktivno učešće kroz prezentaciju najboljih iskustava u oblasti procesuiranja izbornih prevara, pokazatelj je konzistentnog pristupa u ostvarivanju misije i vizije Tužilaštva, ali i općih ciljeva pravosuđa.

\*Korišteni izvori:

<https://podlupom.org>

<https://ystv.pravosudje.ba>







# KONSENZUS

## PRIORITETNA ZAŠTITA IZBORNOG PRAVA

Na konferenciji glavnih tužilaca održanoj 29. maja u Tesliću, uz predmete organiziranog kriminala i korupcije, intenzivno se diskutiralo i o predmetima izbornih prevara i modalitetima unapređenja rada tužilaštava u ovoj oblasti. Konsenzusom glavnih tužilaca zaključeno je da je potrebno nastaviti s prioritarnim rješavanjem ove vrste predmeta, te pojačati saradnju s policijskim agencijama kroz izradu i realizaciju zajedničkih operativnih planova, uz proaktivan pristup u informiranju javnosti.

### Zaključci konferencije glavnih tužilaca u BiH u vezi izbora



-  Potrebno je nastaviti sa prioritarnim rješavanjem predmeta izbornih prevara u tužilaštvima, te je potrebno da VSTV BiH donese zaključke koji će odrediti prioritarnost u postupanju sudova na ovoj vrsti predmeta.
-  Glavni tužioci će pojačati nadzor nad radom tužilaca u predmetima iz oblasti izbornih prevara.
-  Saradnja policijskih agencija i tužilaštava je ključna, te je potrebno nastaviti sa izradom i realizacijom zajedničkih operativnih planova.
-  Potrebno je osigurati kontinuiranu obuku u saradnji sa centrima za edukaciju sudija i tužilaca, kako za tužioce tako i za sudije.
-  Kako bi javnost bila upoznata sa aktivnostima koje se poduzimaju i ostvarenim rezultatima vezanim za procesuiranje izbornih prevara, tužilaštva u Bosni i Hercegovini trebaju proaktivno objavljivati informacije koristeći sve dostupne kanale komunikacije, posebno u izbornoj godini.
-  Sugerije se svim tužiocima da se upoznaju sa novim izmjenama i dopunama Izbornog zakona BiH i svim pratećim podzakonskim aktima, posebno u dijelu koji se odnosi na integritet izbornog procesa.



Učestvujući na konferenciji, glavni tužilac Zekerija Mujkanović predstavio je rezultate ove pravosudne institucije u ciljanim oblastima, naglasivši važnost prioritarnog, konstantnog i proaktivnog djelovanja tužilaštava i drugih uključenih aktera na planu daljnjeg unapređenja rada.



Foto: TBD

**IZBORI  
2024**

## **PRIPREMNI SASTANAK**

U cilju unapređenja zaštite izbornog procesa u Brčkom je 12. septembra održan radni sastanak predstavnika Tužilaštva i Izborne komisije Brčko distrikta BiH. Na sastanku posvećenom ključnim aspektima zaštite izbornog procesa, iz ugla nadležnosti dviju institucija, potvrđena je spremnost za nastavak uspješne saradnje na zaštiti biračkog prava i slobode odlučivanja birača. Sistemski odgovor na izborne nepravilnosti, inicijative, rješenja i kampanje protiv svih vidova krivotvorenja izborne volje građana u fokusu su rada lokalnih institucija.

Tematskom sastanku čiji je domaćin bila Izborna komisija Distrikta, na kojem su prisustvovali glavni tužilac Zekerija Mujkanović i tužilac Pavo Radoš, te predsjednik Izborne komisije Marko Tadić i članice Ljiljana Orendi i Alenka Stojaković Đukić, razmijenjene su ključne informacije o kapacitetima za međuinstitucionalnu podršku, pomoć i saradnju. Učesnici sastanka su saglasni da se partnerskom saradnjom može unaprijediti efikasnost u zaštiti temeljnih društvenih vrijednosti, kakve su nesumnjivo puna vladavina prava, odnosno zakonito provedeni izbori, kao temelji demokratije.

Tužilaštvo je odredilo tužioca Pavu Radoša, kao kontakt tačku za saradnju na zaštiti izbornog procesa. Na dan izbora, Radoš će zajedno s dežurnim tužiocem, osigurati koordinaciju prijema prijave krivičnih djela izbornih prevara i postupanje Tužilaštva u daljnjem toku procesuiranja izbornih nepravilnosti.

<https://fb.watch/uES1md9HUG/>

**Tematsko izdanje emisije "U fokusu"  
(Radio Brčko, 16.9.2024. godine)**



**ZA IZBORNE PREVARE POČINJENE NA PRETHODNIM LOKALNIM IZBORIMA PRED PRAVOSUĐEM DISTRIKTA OSUĐEN JE VELIKI BROJ OSOBA IZ POLITIČKOG MILJEJA, MEĐU KOJIMA SU SKUPŠTINSKI ZASTUPNICI I DRUGI JAVNI ZVANIČNICI, KAO I PREDSEDNICI POLITIČKIH PARTIJA I BROJNI STRANAČKI AKTIVISTI.**

Najčešće su procesuirani za pripremanje krivičnog djela i udruživanje radi počinjenja krivičnog djela u vezi s krivičnim djelom prevara pri glasanju, te za krivična djela povreda slobode odlučivanja birača i davanje i primanje dara ili drugog oblika koristi za trgovinu uticajem.

Najučestalije radnje izvršenja ovih krivičnih djela bile su: pribavljanje kopije ličnih dokumenata trećih osoba i njihovo lažno prijavljivanje za glasanje van BiH, nuđenje na prodaju i direktna kupovina glasova, kao i nuđenje raznih usluga od zvaničnika za glasove na izborima.

Zakonom o izmjenama i dopunama Krivičnog zakona Brčko distrikta BiH iz januara 2024. godine kao novo krivično djelo propisano je Podmićivanje na izborima i u službi koja se finansira iz javnih sredstava.

# RAZMJENA ISKUSTAVA\*

## ZAJEDNIČKI TRENINZI



Foto: Koalicija Pod lupom



Foto: Koalicija Pod lupom

U okviru institucionalnih priprema za predstojeće lokalne izbore, već početkom godine Tužilaštvo Brčko distrikta BiH predstavilo je rezultate i iskustva u procesuiranju izbornih prevara u prethodnom periodu na nizu praktičnih radionica, treninga i okruglih stolova održanih u organizaciji Koalicije pod lupom i OSCE Misijom u BiH.

Cilj navedenih aktivnosti bio je da tužilaštva i policijske agencije na svim nivoima nastave s jačanjem integriteta izbornog procesa, kao i vlastite uloge u provođenju zakona. Učesnici treninga potvrdili su važnost efikasne saradnje i uključenosti lokalnih izbornih komisija, policijskih agencija i drugih aktera, uključujući nevladine organizacije, medije i građane. Tokom treninga u Brčkom, Banjoj Luci i Sarajevu, razmijenjena su iskustva u procesuiranju izbornih prevara, te je razgovarano o izazovima s kojima se tužilaštva i policijske agencije suočavaju u ovom procesu.

Prvi takav trening održan je u prostorijama Policije Brčko distrikta Bosne i Hercegovine 29. i 30.1.2024. godine. Na ovom treningu učesće su uzeli predstavnici Okružnog javnog tužilaštva Bijeljina, Okružnog javnog tužilaštva Doboj, Kantonalnog tužilaštva Tuzlanskog kantona, Kantonalnog tužilaštva Posavskog kantona i Tužilaštva Brčko distrikta BiH. Ispred policijskih agencija učestvovali su predstavnici MUP-a Tuzlanskog kantona, Policijske uprave Doboj, MUP-a Posavskog kantona, Policijske uprave Bijeljina, Policijske uprave Zvornik i Policije Brčko distrikta BiH. Prvom sastanku su se pridružili i predstavnici Misije OSCE-a u BiH.



Foto: Koalicija Pod lupom

Drugi ciklus treninga održan je nekoliko dana kasnije u Banjoj Luci, uz učesće Policije Brčko distrikta BiH, PU Doboj, PU Prijedor i MUP-a Posavskog kantona.

Tužioci Tužilaštva Brčko distrikta BiH, Okružnog javnog tužilaštva Doboj i Kantonalnog tužilaštva Kantona Sarajevo predstavili su iskustva iz tužilačke prakse dajući uvid u konkretne slučajeve i izazove s kojima se susreću, dok su sudije Osnovnog suda Brčko distrikta BiH prezentirali uspješno utvrđenu sudsku praksu u Distriktu Brčko u vezi s izbornim prevarama.





## ZAKLJUČNA RADIONICA

Treći i završni ciklus treninga održan je 12. februara u Sarajevu na kojem su tužioci Tužilaštva Brčko distrikta BiH govorili o dokazivanju krivice u slučaju počinjenja krivičnih djela u izbornom procesu i upotrebi svjedoka i stručnjaka u ovoj oblasti.

Učešće na trećem ciklusu treninga uzeli su predstavnici Državne agencije za istragu i zaštitu, Federalnog ministarstva unutrašnjih poslova, Uprave policije MUP-a Kantona Sarajevo, Uprave policije MUP-a BPK, Uprave policije MUP-a ZHK, Uprave policije MUP-a ZDK, Uprave policije MUP-a HNK, Policijske uprave Foča, Policijske uprave Trebinje i Policijske uprave Istočno Sarajevo.

## KRIVIČNA DJELA PROTIV IZBORNIH PRAVA

Osim tematskih treninga za predstavnike policijskih agencija i tužioce, Koalicija „Pod lupom“ i entitetski centri za edukaciji sudija i tužilaca organizirali su 17. septembra u Tesliću seminar pod nazivom „Krivična djela protiv izbornih prava“.

Učesnici seminara iskoristili su priliku da sagledaju trenutnu praksu i izazove u procesuiranju izbornih nepravilnosti, a među panelistima su bili sudija Osnovnog suda Brčko distrikt BiH Nebojša Savić i glavni tužilac Zekerija Mujkanović.



## Prevenција je najbolja represija

Svi akteri su se složili da je saradnja između pravosudnih institucija, tužilaštava, organizacija civilnog društva i drugih relevantnih subjekata od presudnog značaja za unapređenje izbornog procesa u Bosni i Hercegovini. Naglašeno je da je neophodno nastaviti jačanje pravnog sistema kako bi se osigurala efikasna

borba protiv krivičnih djela koja ugrožavaju izborna prava građana. Zaključeno je da se samo kroz koordiniran rad i stalnu edukaciju može postići veća transparentnost i integritet izbora. Kako je zaključeno, ova zajednička posvećenost predstavlja ključ za izgradnju povjerenja u izborne procese i demokratiju u cijeloj BiH.

## \*PANEL O ZAŠTITI BIRAČKOG PRAVA

Koalicija za slobodne i poštene izbore "Pod lupom" organizirala je 23. maja u Zenici panel diskusiju pod nazivom „Zaštita biračkog prava u BiH“ s fokusom na ulogu tužilaštava i policijskih agencija u izbornom procesu, ali i ulogu organizacija civilnog društva i medija u otkrivanju izbornih nepravilnosti.

Jedna od fokusnih tačaka panel diskusije bila je važnost proaktivnog pristupa tužilaštava i policijskih agencija u BiH u zaštiti izbornog procesa i procesuiranju izbornih nepravilnosti. O ulozi koju imaju tužilaštva i policijske agencije govorili su: Olivera Rauković, v.d. glavnog okružnog javnog tužioca Okružnog javnog tužilaštva u Doboju, Zekerija Mujkanović, glavni tužilac Tužilaštva Brčko distrikta BiH i Saša Lazić, zamjenik šefa Jedinice kriminalističke policije Policije Brčko distrikta BiH.

*„Kada je riječ o nepravilnostima u izbornom procesu, postoji izreka koja kaže da je najbolja represija, prevencija. Ukoliko dođe do nepravilnosti, koje su krivičnopravne prirode, tada je ključna dobra saradnja svih onih koji učestvuju u otkrivanju, gonjenju i presuđenju počinitelaca ovih krivičnih djela.“*




Iz Koalicije „Pod lupom“ su istakli da je neophodno dodatni fokus staviti na sankcije za kršenje izbornih pravila koje će imati snažan efekat odvraćanja od činjenja krivičnih djela.

**BILTEN**  **ZA VIDLJIVOST PRAVDE**

*„Adekvatne visine sankcija mogu uticati, ne samo na kažnjavanje onih koji krše Izborni zakon i provedbene akte, nego i preventivno i na druge učesnike u izbornom procesu, počev od izborne administracije, odnosno na one nesavjesne i neodgovorne članove biračkih odbora kao i na one birače koji ne bi trebali dozvoliti da neki politički subjekti kupuju njihovu naklonost“ - izjavio je Vehid Šehić, predsjednik Strateškog odbora Koalicije „Pod lupom“.*



*Odlučnost, sposobnost, blagovremeno prikupljanje informacija kroz krim-obavještajni i operativni rad, dobra saradnja sa tužilaštvima, odlučan pristup tužilaštva da procesuiru takve stvari, odluke suda koje će biti brzo donesene, bit će najbolji odgovori i poslat će najbolje poruke društvu kada je riječ o izbornim prevarama i njihovom sankcioniranju“ - izjavio je glavni tužilac Zekerija Mujkanović.*



Na panel diskusiji fokus je stavljen i na odgovornost medija i organizacija civilnog društva u izbornom procesu. Pored Vehida Šehića, o ulozi organizacija civilnog društva i medija u otkrivanju izbornih nepravilnosti govorili su Leila Bičakčić, direktorica Centra za istraživačko novinarstvo (CIN) i Srđan Traljić, menadžer za odnose s javnošću *Transparency Internationala* u BiH.


## PODRŠKA KAMPANJI\*

### STOP PRITISCIMA NA BIRAČE

Sredinom godine Koalicija za slobodne i poštene izbore "Pod lupom" predstavila je rezultate istraživanja o pritiscima na birače, nakon koje je započela kampanju podizanja svijesti o različitim oblicima pritiska na birače. Istraživanje je provedeno u 69 od 143 grada i općina u BiH. Od toga u 40 u Federaciji BiH, 28 u Republici Srpskoj i u Brčko distriktu BiH, a obuhvatilo je 868 građana.



Kako je istaknuto, mnogi od pritiska su postali uobičajeni što je dovelo do toga da su se pritisci počeli shvatati kao redovne stranačke aktivnosti. Preko 88% ispitanih upoznato je s pojmom i značenjem političkog pritiska, dok je gotovo 40% ispitanika doživjelo neki oblik političkog pritiska. Blizu 30 ispitanika bilo je prisiljeno učestvovati u aktivnostima mimo svoje volje, a među pritiscima na birače zastupljeni su pritisci od prijatelja, porodice i kolega koji su stranački aktivni na poslu.



Jedan od zaključaka istraživanja jeste i da se ispitanicima govorilo za koga trebaju glasati, prisiljavalo ih se na učestvovanje u kampanjama, te na ulazak u političku stranku, najčešće uz uslovljavanja u vezi sa zaposlenjem.

Koalicija je nakon istraživanja počela raditi na terenu kroz mrežu svojih organizacija s osobama koje su bile izložene pritiscima. „Cilj je da ohrabrimo sve koji su doživjeli pritisak. Preko 10 priča je već objavljeno. Pozivamo da nam se obrate svi koji su doživjeli bilo kakav oblik pritiska na izbornu slobodu“ - poručili su iz Koalicije.

Tužilaštvo Distrikta pridružuje se kampanji „Stop pritiscima na birače“, kao društveno odgovornoj aktivnosti i još jednom zahvaljuje građanima, medijima i nevladinim organizacijama na dosadašnjoj saradnji u zaštiti izbornih prava i sloboda.

Zajedno s Policijom Brčko distrikta BiH i Izbornom komisijom, pozivamo sve društvene aktore da i ubuduće prijave svaki slučaj protivzakonitog uticaja na izbornu volju građana ili bilo koju drugu izbornu nepravilnost za koju saznaju.



U okviru podrške edukativnim projektima mladih 28. marta u prostorijama Tužilaštva Brčko distrikta BiH održan je prijem za učenice JU Gimnazija "Vaso Pelagić" Brčko. Povod za prijem bio je pružanje podrške školskom projektu "Sigurna kuća", kojeg učenice i učenici Gimnazije provode u okviru nastavnog predmeta *Demokratija i ljudska prava*.

Učenicama trećeg razreda ove srednje škole, tužiteljica Gordana Radovanović približila je značaj sigurne kuće u ostvarivanju zaštite žrtava krivičnih djela, kao i ulogu Tužilaštva i drugih organa u lancu društvene podrške žrtvama. U odnosu na temu prijema, naše gimnazijalke pokazale su radoznalost, ali i visok nivo informiranosti i zainteresiranosti mladih za djelovanje sigurnih kuća na području Distrikta Brčko.

*„Posmatrano iz perspektive institucije čija je misija puna zaštita prava i efikasno ostvarivanje pravde, cijenimo da bi postojanje sigurne kuće u Distriktu Brčko, kao i šire i dugoročnije podrške žrtvama, unaprijedilo zaštitu ljudskih prava, a posebno prava djece i mladih u Bosni i Hercegovini“ - zaključuje se u pismu kojim je Tužilaštvo podržalo školski projekat mladih sugrađanki.*



## PISMO NAMJERE

**ZA IMPLEMENTACIJU  
OKVIRNOG SPORAZUMA O RAZUMIJEVANJU  
UNAPREĐENJE PRAKTIČNE NASTAVE I OBUKE ZA STUDENTE  
PRAVA I DIPLOMIRANE PRAVNIKE**

U skladu sa Smjernicama Visokog sudskog i tužilačkog vijeća BiH o dugoročnoj saradnji pravosudnih institucija i pravnih fakulteta u BiH u oblasti praktičnog usavršavanja studenata, Tužilaštvo se pridružilo Okvirnom sporazumu o razumijevanju pod nazivom

„Unapređenje praktične nastave i obuke za studente prava i diplomirane pravnike“, čije su potpisnice pravni fakulteti, centri za edukaciju sudija i tužilaca, strukovna udruženja, advokatske komore i pravosudne institucije u BiH. Činom potpisivanja izvršenim 29. jula, Tužilaštvo je pristupilo ovoj važnoj inicijativi bh. pravosuđa s namjerom pružanja aktivnog doprinosa i podrške daljnjem razvoju pravne struke u BiH primjenom metodologije učenja zasnovanog na praksi. U tom smislu, Tužilaštvo se, sa svim raspoloživim institucionalnim kapacitetima, obavezalo na implementaciju Okvirnog sporazuma, kako je navedeno u pismu namjere koje je dostavljeno stranama potpisnicama i Visokom sudskom i tužilačkom vijeću BiH.



## DRUŠTVENE MREŽE I KOMUNIKACIJSKA INKLUZIJA

TRANSPARENTNOST KAO PRINCIPIJELAN ODNOS PREMA INTERESU JAVNOSTI DA BUDE UPOZNATA SA KLJUČNIM INFORMACIJAMA O RADU PRAVOSUĐA, OŽIVOTVORUJE SE KROZ TAČNE, PROVJERENE I AŽURNE INFORMACIJE O RADU TUŽILAŠTVA, LAKO DOSTUPNE INFORMACIJE GRAĐANIMA U POGLEDU NAČINA RADA PRAVOSUDNIH ORGANA I NAČINA OSTVARIVANJA PRAVA, TE KROZ KONTINUIRANU I OTVORENU KOMUNIKACIJU SA MEDIJIMA, NEVLADINIM ORGANIZACIJAMA I DRUGIM SUBJEKTIMA KOJI IMAJU LEGITIMAN INTERES DA BUDU INFORMIRANI O RADU PRAVOSUĐA, KAO I KROZ KVALITETNE I JASNO OBRAZLOŽENE TUŽILAČKE I SUDSKE ODLUKE (Komunikacijska strategija Visokog sudskog i tužilačkog vijeća).

*U okviru panela o korištenju društvenih mreža predsjednik Općinskog suda u Tuzli Muhamed Tulumović i sekretar Tužilaštva Distrikta Samir Beganović predstavili su ciljeve, pozitivna iskustva i prednosti korištenja službenih Facebook stranica pravosudnih institucija iz kojih dolaze.*

### Smjernice VSTV-a i dobre prakse predstavljene na TAIEX konferenciji

U saradnji TAIEX-a, instrumenta tehničke pomoći Evropske Unije, i Visokog sudskog i tužilačkog vijeća Bosne i Hercegovine (VSTV), 20. juna u Sarajevu predstavljene su Smjernice za korištenje društvenih mreža, kao zvaničnih kanala komunikacije pravosudnih institucija.

Konferencija održana tim povodom okupila je preko stotinu učesnika, među kojima i istaknute članove VSTV-a, rukovodioce sudova i tužilaštava, sudije, tužioce, stručno osoblje, kao i međunarodne eksperte, uz čiju pomoć su izrađene i predstavljene prve smjernice za rad pravosuđa u ovoj oblasti. Na koji način pravosudne institucije i nosioci pravosudnih funkcija trebaju koristiti društvene mreže kao zvanične kanale komunikacije centralno je pitanje Smjernica i TAIEX konferencije.





Kao panelista na ovu temu, Beganović je istakao da je transparentnost u ovoj pravosudnoj instituciji postavljena kao apsolutni strateški cilj, naglasivši da službena Facebook stranica ovog tužilaštva, kao prva internetska platforma ovog tipa u pravosuđu u BiH, služi upravo tom cilju, naročito u sferi dodatnog unapređenja proaktivne i dvosmjerne komunikacije. Pored ostalog, on je dodao da otvaranje službene stranice na Facebooku ne podrazumijeva prestanak korištenja tradicionalnih kanala komunikacije, već im, naprotiv, služi kao komplementaran servis.

*„Takođe, uz internetsku stranicu na koju se sadržajno naslanja, Facebook stranica Tužilaštva Brčko distrikta BiH stalno je dostupna online informativna i edukativna platforma namijenjena dijelu javnosti kojem su društvene mreže primarni izvor informacija“ - zaključio je. Osvrnuvši se na nedavno usvojene Smjernice, on je ocijenio da su u cijelosti kompatibilne s dosadašnjom praksom, strateškim pristupom i komunikacijskom vizijom ove institucije, dodavši da predstavljaju koristan i praktičan alat za pravosudnu zajednicu, posebno u sferi savremene institucionalne komunikacije.*

## PLANSKE OSNOVE

**U SKLADU S OPĆOM I KOMUNIKACIJSKOM STRATEGIJOM TUŽILAŠTVA, SVE PLANSKE AKCIJE KOJE SE PREDUZIMAJU U POGLEDU UNAPREĐENJA EFIKASNOSTI, EFEKTIVNOSTI I KVALITETA, TE ODRŽAVANJA APSOLUTNE NEZAVISNOSTI, INTEGRITETA I TRANSPARENTNOSTI, TREBA DA REZULTIRAJU JAČANJEM JAVNOG POVJERENJA U PRAVOSUĐE, TAKO DA PRAVOSUDNE INSTITUCIJE BUDU PREPOZNATE KAO VISOKO USPJEŠNE I JAVNO ODGOVORNE INSTITUCIJE U SLUŽBI GRAĐANA I JAVNOG INTERESA.**

### FB STRANICA TUŽILAŠTVA BRČKO DISTRIKTA BIH OSNOVANA 2020. GODINE

## Videokolaži

Your Reels

Saved reels





## Tužilaštvo Brčko distrikta Bosne i Hercegovine



*Kontaktirajte nas*

*Trg pravde, broj 10, 76 100 Brčko,*

*Brčko distrikt Bosne i Hercegovine*

*centrala 049/217-227*

*glavni tužilac 049/217-465*

*faks 049/ 219-088*



jtbd@jtbd.ba (**elektronski protokol**)

z.mujkanovic@jtbd.ba i zekerija.mujkanovic@pravosudje.ba (**glavni tužilac**)

v.tepavcevic@jtbd.ba (**zamjenik glavnog tužioca**)

prijavakorupcije@jtbd.ba (**protokol za prijavu korupcije**)

prijavadiskriminacije@jtbd.ba (**protokol za prijavu rodne diskriminacije**)

pritužbe@jtbd.ba (**protokol za pritužbe na rad službenika**)

s.beganovic@jtbd.ba (**protokol za odnose s javnošću**)

**Direktne email adrese zaposlenih:** [početnoslovoimena.prezime@jtbd.ba](mailto:početnoslovoimena.prezime@jtbd.ba)

### INTERNETSKE PLATFORME

<http://jt-brckodistriktbih.pravosudje.ba>

Facebook



EFIKASNOST / EFEKTIVNOST /  
KVALITET

## STRATEŠKE ODREDNICE

NEZAVISNOST / TRANSPARENTNOST /  
INTEGRITET

INSTITUCIONALNA

# M I S I J A

**TUŽILAŠTVO BRČKO DISTRIKTA BIH JE PRAVOSUDNA  
INSTITUCIJA KOJA, U SARADNJI S DRUGIM ORGANIMA  
OTKRIVANJA I PROCESUIRANJA KRIMINALA,  
EFEKTIVNO SPROVODI PRAVDU U KRIVIČNIM  
STVARIMA.**

ORGANIZACIJA

ODSJEK ZA RATNE ZLOČINE

ODSJEK ZA ORGANIZIRANI KRIMINAL, PRIVREDNI KRIMINAL I KORUPCIJU

ODSJEK ZA OPĆI KRIMINAL

U OSTVARIVANJU SVOJE MISIJE I VIZIJE, UVAŽAVAJUĆI NAJVIŠE STANDARDE PROFESIONALNOG INTEGRITETA, **TUŽILAŠTVO BRČKO DISTRIKTA BOSNE I HERCEGOVINE** UVIJEK JE NASTOJALO PROMOVIRATI ODGOVORNOST, MARLJIVOST I PROFESIONALIZAM, KAO NUŽAN STANDARD PONAŠANJA U JAVNOJ SLUŽBI I USLOV POTPUNOG POVJERENJA JAVNOSTI.

